

19 JAN 2002

MUSTAPA-BELANJA

JUMLAH PERBELANJAAN DARIPADA BELANJAWAN RM7.3 BILION DIKETAHUI 10 FEB

KANGAR, 19 Jan (Bernama) -- Jumlah sebenar perbelanjaan yang digunakan daripada pakej ransangan berjumlah RM7.3 bilion yang diumumkan kerajaan tahun lepas akan diketahui awal bulan depan, kata Pengarah Eksekutif Majlis Tindakan Ekonomi Negara (MTEN) Datuk Mustapa Mohamed.

"Kita memang memantau setiap minggu dan nampaknya ada peningkatan (dari segi perbelanjaan)," katanya kepada Bernama ketika meninjau pusat undi di Sekolah Kebangsaan Seri Perlis di sini hari ini.

Beliau berkata bayaran masih dibuat sehingga 31 Jan ini dan ada projek yang sedang dilaksanakan.

"Kita tak ada angka terakhir dan jumlah perbelanjaan sebenar yang dibuat cuma akan diketahui sekitar 10 Feb depan", jelas Mustapa.

Beliau berkata rancangan perbelanjawan itu akan dapat membantu menyelesaikan banyak masalah, katanya.

Kerajaan dalam usaha menepis kemungkinan kesan negatif kelembapan ekonomi global yang akan berlaku telah mengumumkan satu pakej ransangan berjumlah RM4.3bilion.

Perdana Menteri Datuk Seri Dr Mahathir Mohamad ketika mengumumkan perkara itu pada 25 Sept tahun lepas berkata akibat peristiwa-peristiwa yang berlaku di dalam ekonomi global, pertumbuhan ekonomi Malaysia dijangka sekitar 1.0 hingga 2.0 peratus.

Pengumuman langkah-langkah ransangan itu adalah tambahan kepada pakej ransangan RM3 bilion yang diumumkan Mac tahun lepas bagi pembangunan projek-projek infrastruktur seperti sekolah, kolej komuniti, universiti baru dan peruntukan RM28 bilion di dalam Belanjawan 2002 pada Oktober tahun lepas.

Rancangan perbelanjaan itu termasuk mempercepatkan pembinaan 35,000 unit rumah pangsa bagi mengatasi masalah setinggan di Kuala Lumpur menjelang 2003.

Selain itu kerajaan akan menggandakan kadar semasa bagi pembayaran kebajikan untuk membantu keluarga miskin dan peruntukan khas untuk menaik taraf tadika kendalian Jabatan Kemajuan Masyarakat.

Rancangan itu juga termasuk tambahan RM300juta bagi menaik taraf dan kerja penyenggaraan bangunan-bangunan kerajaan, rumah kakitangan dan kemudahan terutamanya sekolah, balai polis dan prasarana luar bandar.

Di samping itu, tambahan sebanyak RM300 juta juga disediakan bagi membina makmal komputer di 2,000 buah sekolah.

-- BERNAMA

NH NHD